

Inuit inigisaminniit anisitaasarunnaarnissaat siunertaralugu Naalakkersuisut periusissiamik UPA2019-imi saqqummiussassamik suliaqaqqullugit peqquneqarnissaat Inatsisartut aalajangiiffigisassaattut siunnersuut

(Inatsisartuni ilaasortaq Aqqaluaq B. Egede, Inuit Ataqtigiit)

Akissuteqaat

(Ineqarnermut Attaveqaqtigiinnermullu Naalakkersuisoq)

Siullermeerneqarnera

Aallarniutigalugu Naalakkersuisut sinnerlugit Inatsisartuni ilaasortaq Aqqaluaq B. Egede, Inuit Ataqtigiit, aalajangiiffigisassatut siunnersuuteqarneranut qutsavigaara.

Naalakkersuisut 2017-imi “Akiitsut akiitsunillu akilersuisarneq pillugit nassuiaat” saqqummiuppaat. Nassuiaat tunngavigalugu Naalakkersuisut 2017-imi Kommune Kujallermi akiitsut pillugit siunnersuisarnermik, misiligutaasumik ukiuni marlunni ingerlanneqartussamik aallartitsipput. Suliniuteqarnerup kingunerisaanik INI A/S ilaatigut kommuni suleqatigalugu akiitsut pillugit siunnersuisartoqatigiinnik pilersitsivoq, taakkulu inunnut imaluunniit ilaqutariinnut, ineqarnermi akiitsulinnut toqqaannartumik orniguttarlunilu attaveqartarnermik annertunerujussuarmik suliaqartussaapput.

Aammattaaq nassuiaammi taaneqartutut attartortunik anisitsisarneq siunissaq ungasissoq tikillugu attartortumut pineqartullu ilaqutaanut inooqatigiinnikkut kinguneqarsinnaavoq. Taamatuttaaq nassuiaammi taaneqartutut ilaqutariit inigisaminnit anisitaasartut ukiut ingerlanerini amerliartorsimapput. Inissiaatileqatigiiffiit suliaasaqarfimmut sukannernerusumik aqutsilernerisa kingunerisaanik akiliinngitsoortarnerit kinguneqartinneqartarnerat tamatumunnga pequtaasartut ilagaat.

Nassuiaammi ineqarnermut akiligassanut akiliinngitsoortarnernut ajornartorsiutit arlallit tikkuarneqarput. Kiisalu nassuiaammi inassuteqaatinik, attartortitsinermit inatsisip aaqqissuunneqarneranut atatillugu ilanngunneqartussamik arlalinnik saqqummiussisoqarpoq.

Nassuiaatip malitsigisaatut attartortitsisarnermut peqqussut attuumassuteqartutigit naleqqussarneqassaaq, taakkunungalugu qaammammi ullup aningaaseriviup ammaffigisaani kingullermi ineqarnermut akiliutit akilerneqartarnissaannik qulakkeerinnissaq pillugu 2016-imi Inatsisartut Ukiaanerani Ataatsimiinneranni immikkoortoq 60 aalajangiiffigisassatut siunnersuutip malitseqartinneqarnissaa ilaatinneqassaaq.

Naalakkersuisut ineqarnermik aaqqissuussinermit ingerlanneqartumut ilagitillugu inissianut attartortittakkanut inatsimmik nutaamik suliaqassapput. Taamaalilluni akiitsunut akiitsullu

pillugit siunnersuisarnermut nassuiaat, kiisalu qaammammi ullup aningaaseriviup ammaffigisaani kingullermi ineqarnermut akiliutit akilerneqartarnissaannik qulakkeerinissaq pillugu 2016-imi Inatsisartut Ukiaanerani Ataatsimiinneranni immikkoortoq 60 aalajangiiffigisassatut siunnersuut malitseqartinneqarlutik aallartinneqareerput.

Naalackersuisut 2017-imi “Akiitsut akiitsunillu akilersuisarneq pillugit nassuiaat”, attartortitsisarnermut inatsimmut ilanngunneqartussa q saqqummiutereermassuk, suliniutissamik nutaamik aallartitsinissaq Naalackersuisunit pisariaqartutut isigineqanngilaq.

Tamanna peqqutigalugu Naalackersuisut siunnersuutip itigartinneqarnissaa inassutigaat.